

TESADONICA YACNOCQUIDON ISTE 1

Pabadon tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caid-bēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. ³ “Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴ Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. ⁵ Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —queshun mimbi Esus tantiabonondac. Adembidi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ěmbi chuisho tantiondac. ⁶ Aden Nuquin Papan Esus tantiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid

chuihanac Nuquin Papan Mayanën namiacpadec cuishon-
 quequin mimbi Esus tantiondac utsibon: —Padi. Chën
 —quequin comapenen chieshënquionobi. ⁷ Adec mibi
 bēdamboec tabadaid chuisho tantiash min nidaidën ic-
 quido Masedonia yacnocquido Esus tantiaquido mibi yac-
 padquiec tabadtiadquio icpac caosh. Adembidi tantiash
 nēid nidaid Acaya caid yacno tabadquidotsen adtiadquio
 icpac caosh. ⁸ ¿Anocquidonuidida mibi Esus tantiec bē-
 damboec tabadaid tantiapash? Padenquio. Mimbi chiesh-
 toenquio icquin Esusën naid chuihanac nidaid utsi-utsiec
 yacno tabadquidon tantiac caosh. Adashic aido mibi
 caic: —Nuquin Papa tantiaquidombo nec —quecuededac
 caosh. Aden mimbi naid chuisho tantiashun: —Tantiash
 —qeshun nēmbo icquido mimbi naid chienquio iccombi.
⁹ Mimbi naid naden chuisho tantiombi. —Pabado chedon
 Esus chuibansho tantiash: “Nuquin Papapadquid utsi
 nibēdec,” qeshun Nuquin Papabēdta Esus tantiabenac
 caosh. Adshun ambi papa quequin nacnenaid aidon
 tantienquio yanac caosh. Aden Nuquin Papan chiac-
 padomboen natiadquio yanac caosh —quequin chioishi.
¹⁰ Adashic: —Adquid yec Nuquin Papa yacnuēsh aton
 mado Esus nidaidën padpidec chosho istiadquio iquec.
 “Ēbi cuidmenquio icnuec abided cuidadec unēsacsho
 Nuquin Papan uincuemiaid Esus choec,” qeshun aid
 istiadquio iquec —quequin mimbi naid chioishi.

2

Pabadon bēdamboen chuihanondaid

¹ Mibi yacnoshon tauamboen ěmibi chuihanac Esus tan-
 tiaquid yanshun mimbitsen utsibo Esus chuihanondac.
² Shubu dadpen icquid Pidipos caid yacnoshon quēnën
 nauedac ěbi mēyadec tsadboedi puduemeshun nidmiac
 mibi yacno nidshun Esusën naid mibi chuihanondambi.

Utsibo dadpenshun chieshënnubi Nuquin Papan nami-acpadomboen cuesambo icquin mibi Esus chuibanondambi. ³ ¿Ëmbi naidquio namenuendambi adodionda? Padenquio. ¿Ëbi tantiamenuendambi chuibandionda? Mambi padenquio iccondac. ¿Ambembi chiaidtambi mibi chuibandionda? ⁴ Mambi mibi abimbo chuibampondac. Matsesën naidtedi tantiaquidënquio Nuquin Papan: —Aidën abimbo chuibantsiashe. Con Mado Esusën naid chuibenequid icmenu —caidquio nebi. Adquid yec matses: —Mibi bëdambo iquec —cameteuidi bunenquio iquebi. Nuquin Papa: —Mibi bëdambo iquec —camenuembimbi ambi chiacpadomboen naic. ⁵ Ëmbi tantiacpadomboen mibi namenuc: —Mibi bëdambo iquec —quenquio iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. ⁶ ¿—Pabado bëdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusën naid tantiamenuembimbi bëdamboen chuibanondac.

⁷ —Ëbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquio iccondac. Anin bacuë nëishmenquio icquin bëdamboen namiacbimboembimbi nëishmenquio icquin mibi chuibanondac. ⁸ Mibi tantiaquioquin chieshtoenquio icquin Esusën naid chuibanec yuec mibëd tabadondabi. Aden naic tabadec bëdambo iccondabi. ⁹ ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacenendeniondambi. Mibi caic: —Ëbi menianiac aton piucquid naimëdnushe —quiash con piucquid bednuec chonoadteniondabi. Mimbi isnubi adondabi.

¹⁰ Mibëd yec Nuquin Papan chiaid niaquenquio yec bë-

damboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanédashi. ¹¹ Amën aton mado: —Naden na —quequin nëishmenquio icquin chiacbimboen mibi abentse-abentsen bédamboen chuibanquin ¹² mibi bédambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiacpadec bédamboec tabadquid neque. Ambi chiaid niaquenquio yec bédamboec tabadnuna —mibitedi cadeniondambi.

¹³ Aden Nuquin Papan chiaidquio chuibanac: —¿Ambembida chuidiosh? Nuquin Papan chiaidquio ma Pabadon chuiboc —mibi quianondac. Aden Nuquin Papan chiaidquio tantiaish Esus tantiaquido yanash aidquiobidi chuisho tantiaish mibi bédambo yanec. Mibi адаid tantiaquin Nuquin Papa chianembi naden. —Tesadonica yacnocquido aden bédamboen tabadmequid yec mibi bédamboshë iquec, Papa —quequin Nuquin Papa chianembi. ¹⁴ Nidaid Udeya caid yacnocquido yacpadquiec chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshënac chieshtoenquio iccondash. Adomboembidi aid matses mibi yacno tabadquin chieshënac mibi chieshtoenquio iccondac. ¹⁵ Isadaidbombidi Nuquin Papan chiaid chuibanquido cunesun secapampic. Adembidi Nuquin Icho Esus unës uapac caondash. Adomboembidi chieshënquin mibi yacnoshon cuemepondashi. Aden Nuquin Papa chieshënquinc matses abitedi chieshënquinc caquin ¹⁶ isadaidbon matses utsi isadaidpembo ëbi chuimetiapimbo icpondash. —Esus tantiaisho Nuquin Papan bédamboen isquin mibi cuidenquio iquendac —quequin ëmbi chuisho: —Padi. Aid chienda. Cueschito-

mane —capondashi. Aden ambi chiaid ënenquo icquin niac-niacsho Nuquin Papan aido cuidquiendac.

Pabado istante bunaid

¹⁷ ¿Mibi yacnoshon aden chieshëmënquidon cuemiac mibi tantienquiodambi ictionda? Mibi unësquo icnuc mibi instantiadquo iccondabi. ¹⁸ Adec: —Padpiden istanu —quesho Satanasën nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasën nacbidi padenquo iccondabi. Nëbi adecbidi mibi instantiadquo iquebi. ¹⁹ Nuquin Icbo Esuquidistu choan aibdëd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ëmbi chuibanac Esus tantiabenondaido neque —capatsia? Mibibimbi caic. ²⁰ —Esus tantiec bëdamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bëdamboen naondac. Mimbi chuibanac ëbi tantiabenondash —ëbi caindac Nuquin Icbon.

3

Istan, quequin Timoteyo chiaid

¹ Aden mibi tantiec: —“¿Mitsipadec tabadpec?” quequinuidtsëqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ëbëd icquid utsi Sidbano chuiquin: —Timoteyo nidan nuquiuuidtsëqui icnuna —caondambi. ² Ëmbi: —Nid —caonaid Timoteyo Esus tantiaquid yec nuquin utsi nec. Ëbëdtan Esus chuibenequidquo nec. Adquid icsho nadopondambi. —Tesadonica yacno nidshun Esus bëdamboen

chuibantan. Adembidi: “Esus tantiec chieshtoenquo yec nadquiec tabadquid nendac,” quequin bēdamboec tabadquin ismetan, Timoteyo. ³ Aton mat-sesēn comapenen chieshēnac chieshtoshon Esus tantienquo yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. ⁴ Aden mibēd icquin chuideniondambi. Adsho ěmbi chiacpadomboen nuqui chieshēnondash. ⁵ —“Ĕbi nidan chieshēnac ĵadecbidida Tesadonica yacnocquido chieshtoenquo icpatsiashba?” quequidtsēqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquo yanushe. Istan. ĵAda ěmbi Esus chuibanondaido bēdamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. ⁷ Timoteyon chuiboed tantiash bēdambo yanobi. Nēmbo icquidon chieshēnac shubiantiadtsēcquo iccobi. Adboedi mibi caic: —Chieshtoenquo icquin Esus tantiosh —quesho tantiash bēdambo yanobi. ⁸ Mimbi aden naid tantiash dayacquo yacbimboec iquebi. ⁹ Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. ¹⁰ Aido istiadquo iquebi. Mimbi chiaid bēdiactsēc tantiasho

aidoböd tabadquin bëdamboen chuibantsiambique. Èbi ano nidmeta, Papa —quequin Nuquin Papa chianembi.

¹¹ —Nuquin Icbo Esusbëdtan Nuquin Papan nëbimbobi ambo nidmepashuni —caimbi. ¹² Adec mibëd ictiadquo icquin Nuquin Papa mibi chianembi. —Èmbi aido tantiaquiacpadomboen utsiboböd tantianameta, Papa. Bëdiactsëc tantianantsëchoedobi comapenec tantianamequiota, Papa. Adembidi utsibotsen bëdamboen ismeta. ¹³ Aden bëdamboec tabadquid icmeta, Papa. Mimbi adoac chieshtoenquo yec bëdamboec tabadtsiash. Adsho mimbi mibi yacnoshon uaido mayan bëdaboböd nidaidën padpidec choshon con Icbo Esusën: “Tesadonica yacnocquido icsambo iquec,” catiapimbo ictsias. Adembidi: “Icsambo iqueque. Cuidnuna,” catiapimbo mimbi ictsias, Papa —quequin Nuquin Papa chianembi mibi chuiquin.

4

Chidoböd bëdamboec tabadte chiaid

¹ Tantia, con utsibo. Chiaid utsitsen mibi chuinu. —“Bëdambo mibi iquec,” Nuquin Papa camenuc bëdamboec tabadta —quequin èmbi chiondacadquieci tabadta. Nuquin Icbo Esus tantiaquieci adta. —Bëdamboec tabadosh —quesho tantiasun: —Adquiequi tabadta —caimbi mibi. ² Nuquin Icbo Esusën namiac aidën chiaidquo mibi chuibanondambique. Aid tantiaquieci bëdamboec tabadta. ³ Nuquin Papan tantiamiacpadquieci tabadquidën nadoquid yendac. Utsin chido chudenquo icquin aton chidouidsëqui chudquid yendac. Adembidi chidon dada utsi chudmenquo icquin aton bënëuidtsëqui chudmequid yendac. ⁴ Adec Nuquin Papan chiaid niaquenquo yec abi bunaid mëmunec dada ambi inaidquo aton chidouidsëqui chudec aidböd bëdamboec tabadsho: —Bëdambo iquec

—catsiash Nuquin Papan. ⁵ Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesa icquin chidon utsin shui bunquin aton bënëpenquo chudmendac. Adec tabadenda. ⁶ Bënë nidan aton chido abentsëqui uequid istuidshun chudenda. Adoquid Nuquin Papan cuidendac ëmbi chiondacpadomboen. ⁷ —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquo. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. ⁸ Aden chuiquin aton Mayan nuqui menequidën Nuquin Papan chiaid chiec nebi. Aden ëmbi chuiboed niacquin Nuquin Papan chiaidquo mimbi niactsiac.

Adecbidi tantiananquiota, quequin chiaid

⁹ —Bëdamboec tantiananta —quequin padpiden chienquo iquembi. Nuquin Papan tantiamiac Esus tantiaquido yec mibi tantiananec. ¹⁰ Min nidaid Masedonia caidën tabadquido Esus tantiaquido utsibotedi mimbi tantiec. Mibi yacpadquiecbidi tantiananquoquin utsibotsen tantiaquiota. ¹¹ Ëmbi chiondacpadquiec chieshëmënenquo yec bëdamboec tabadta. Utsi icsaiduidi chienquo yec bëdamboec tabad. Chieshenquo yec dayacquio yec chonoadta. ¹² Adash bunenquo mibi ictsiac. —Con na nacnenambo iccombique. Mitsana beccho —mibi quenquo ictsiac. Mibi adquo icsho isash Esus tantiesabo: — Esus tantiaquido bëdamboec tabadec —quetsiash.

Esusën abi yacno abi tantiaquido buante chiaid

¹³ Tantia, con utsibo. —“Esusën abi tantiaquido uincuemendac,” quequin chuisho mimbi tantiabi icnushe —queshun mibi bëdamboen chuinu. Esus tantiesabo:

—Ĕmbi tantiaidquio padpidec isadenquio iquec —quec yuecquio shubiabimboec shubienda. —Ĕbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusĕn uincuemetemibi chuinu. ¹⁴ —Unĕs uaqui Esus uincuenacpadecebidi nuquitsen uincuenendac. Esus tantiaquido unĕsacsho uincuemeshun Nuquin Papan abi yacno aton Mado Esus buamendac —quequin nuqui tantiec. ¹⁵ Tantia. Nuquin Icbo Esusĕn chiaidquio mibi chuinu. Nuquin Icbo Esus nidaidĕn padpidec chonoc aid istuidec Esus tantiaquido unĕsabi icquido abia nidenquio iquendac. ¹⁶ Padenquio icnubien Nuquin Papa yacnuĕsh choec Nuquin Icbo Esusba nua cuĕdtuidendac. Adnubien Nuquin Papan abi yacnoshon uaido mayan bĕdabo chuiquid dapatsen nua cuĕdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusĕn abi tantiaquido unĕsaidotedi abia aton dada chuca uaquin uincuemendac. ¹⁷ Adoaquien aidobĕdi Esus tantiaquido unĕsabi icquido tsidadash aidotedi abuctoendac Nuquin Papabĕd tabadec nidec. Abitedi abuctoquimbi abi bĕquedec Esus chosho istuidendac. Adash Esusbĕd Nuquin Papa yacno nidash anobi nuqui quenenendac. ¹⁸ Ĕbi adsho tantiaishun nadota. Aton matses unĕsaid tantiec shubiquido bĕdambo icmenuen ĕmbi chuiboed chuita.

5

Esus chote chiaid

¹ Tantia, con utsibo. Mibi chuinu. —Nĕidtedec ushash Esus padpidec choec —quequin chuitiapimbo iquebi. Adembidi: —Nĕidted seta matamias choec —quequin dada uatiapimbo iquebi. Tantienuio iquembi. Naden mibi chiondambi. ² —“Nĕid inchĕshĕmbi ampequid choec,” quequin tantiatiapimbo yacnimboec: “Aid ushĕn

Nuquin Icbo choec,” quequin tantiatiapimbo icnuc Esus choaindac —quequin mibi chiondami. ³ Esus tantienquo yequi matses dadpen: —Cuesnanenquo yec nuqui bēdamboec tabadec —queshobien ambi: —Ēbi cuidendac —cacmaidēnquo padpidec choshon cuidquiendac. ¿Mitsipadquo chido bacuë usunquid icpec? —Aid ushēnquo tishembi —quequin tantiatiapimbo yequi badedquo nēncuenec. Adecbidi ambi: —Choec —cacmaid Esus badedquo chosho abi tantiesabon cuenēntiapimbo iquendac. ⁴ ¿Esus chonoda nuqui dacuēdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nēbien Esus chochitec —quec bēdamboec nuqui tabadnubi Esus chonoc nuqui dacuēdenquo iquendac. ⁵ ¿Pacuēnēdabimboecquidoda nuqui nedi? Padenquo. Pabiate paposhquiacbimboecnuc Esus bēdamboen tantiamiaido yec bēdamboec tabadquido ma nuqui neyoc. Adecbidi bēdamboec tabadnuna. ⁶ Ushquin pabiaten tantienquo yacbimboen utsibon Nuquin Icbo Esus tantienquo iquec. Adec tabadenquo icnuna. —Esus tantienquo icmane —queshun nuqui icsate bunaid nainquo icquin mēmunnuna. Nuquin Icbo chosho istiadquo yec bēdamboec tabadnuna. ⁷ Esus tantiesaboen inchēshēn ushquin tantienquo yacbimboec iquec. Adquiecbidi tantiadenuen acte paēmbo icquid acquido nec. ⁸ Adquidpenquo yec Esus tantiaquido yec bēdamboec tabadnuna. Nuqui icsate bunaid nainquo icquin mēmunnuna. Sondado: —Shocosh tsasimbo icquid shictonquenu. Sicsenushe —quiacbimboec icnuna. Satanasēn Esus tantiamenquo icnushe. Esus tantiaquiquin matsesten tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacbimboecbidi icnuna. Satanasēn icsamboen tantiamenquin chieshtomenushe. —Esus tantiasho cuiden-

quio icquin Nuquin Papan abi yacno ëbi tabadmen-
 dac —quequin bēdamboen tantianuna. ⁹ ¿Cuidnuenda
 Nuquin Papan nuqui Esus tantiamediac? Padenquio.
 Abēdi tabadmenuen Nuquin Icbo Esuquidistu nuqui tan-
 tiamiac. ¹⁰ Aidi abi tantiaquid cuidmenquio icnuec abided
 ciudadec unēsac caondash. Aidēn padpidec choshon
 abi tantiaquidotedi buanshun abēdi tabadmendac. Unē-
 said uincuemiaidobēdta unēsabi icquidotedi adoendac.
¹¹ Ēbi adsho tantiashun mimbi nabocpadomboembidi
 Esus tantiec bēdambo icnuec ěmbi chuiboed chuinan-
 quiota. Adecbidi bēdamboec tabadec: —Adequi tabad-
 nuna —cananta.

Bēdamboec tabadte Pabadon chiaid

¹² Esus mibi chuibanquido bēdamboen ista. —Nuquin
 Icbon chiacpadomboen chieshtoenquio icquin nuqui
 chuiquidēn nuqui bēdamboen chuibanec —quequin
 aido bēdamboen tantiata. Mibi nashunquidombo
 neque. Aidon: —Nuquin Papan chiaid niaquenquio yec
 bēdamboec tabadnuna —quequin chuisho bēdamboen
 tantiata. ¹³ —Nuquin Papan chiaid bēdamboen
 tantiaquidombo nec —quequin bēdamboen ista. Adc
 chieshēmēnenquio yec bēdamboec tabadta. ¹⁴ Mibēd
 icquido naden chuiban. Chieshquid icsho: —Mibitsen
 chonoadta —cata. Dacuēdsho: —Dacuēdenda —cata.
 Esus bēdiactsēc tantiatsēcsho bēdamboen chuiquin Esus
 tantiamequiota. Dada padishquio icsho nashunta. Aden
 nēishenquio icquin abitedi bēdamboen ista. ¹⁵ Utsin
 chieshēnac cuidnanenquio yec bēdamboec tabadta.
 Mibēdtan Esus tantiaquidobēd bēdamboec isnanquin
 utsibotsen bēdamboen ista.

¹⁶ Aden Esus tantiec ěnēdenquio yec cuishonquianeta.

¹⁷ Adembidi Nuquin Papa chianequin: —Ěmbi chiac-
 padomboen ěbi nashunquin utsibotsen nashunta, Papa,

—quequin chianeta. ¹⁸ ¿Mimbi chiacpadomboen Nuquin Papan nasho isunuidida mimbi: —Nuquin Papa bēdambo iquec —cape? Nadoac bēdambo ictsiash. Bēdamboec tabadquin: —Mibi bēdamboshē iquec, Papa, —cac bēdambo ictsiash. Daicsabudshumbic adembidi nac bēdambo ictsiash. Paēmbo icnubi adembidi. Mitsana icnuc adembidi. Mitsana nibēdnubi adembidi. Utsibon chieshēnaqui adembidi: —Mibi bēdamboshē iquec, Papa —cac bēdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. ¹⁹ Nuquin Papan Mayanēn Nuquin Papan chiaid tantiamiac pamumēdacbimboec tabadenda. ²⁰ Aden Nuquin Papan Mayanēn tantiamiac utsibontsen chuisho: —Mue nec —badedquio cainda. Chuishoba tantiatā. —Nuquin Papan chiaidquio chuinu —quesho mamēnshunenda. ²¹ Adenquio icquin: —¿Nuquin Papan chiaidquibida chuibaneque? Tantiabono —cata. Aden tantiašun Nuquin Papan chiaidquio isbanta. Aden isbanquin abimbo chuisho tantiašun: —Ai, Nuquin Papan chiaidquio chiec —queshun aidēn chuisho bēdamboen tantiatā. ²² Adembidi Nuquin Papan chiaid isbanquin icsamboen chuisho tantiašun: —Nuquin Papan chiaidpenquio chiec —queshun aidēn chuisho tantienda. Aidēn chiacpadomboen nainda.

²³ Mibi Nuquin Papa chianembi. —Matses bēdambo icmequid icquin mimbi chiacpadomboen aido name, Papa. Mimbi chiaidquio bēdamboen tantiamequin bēdamboen tabadme, Papa. Mimbi adoac bēdamboec tabadnuc choashun con Icbo Esusēn: “Aido bēdambo iquec,” catsiash, Papa —quequin Nuquin Papa chianembi mibi. ²⁴ Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquio iquendac. ²⁵ Nuquin Papa ēbi chianeta. —Abēd icquidobēdta Pabado bēdamboen nameta, Papa

—quequin Nuquin Papa chianeta. ²⁶ Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. ²⁷ Nuquin Icbon tantiacpaden chuiquin dada uaombique. Ĕmbi dada uaboed nēid isquin ambocquido Esus tantiaquidotedi chuiban. ²⁸ —Nuquin Icho Esuquidistun bēdamboen ispashun —quequin mibi tantiemi. Padi. Aidedi dada uaombi.

**Esuquidistu Chuiquin Tantiamete
New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

